

## LA ORGANIZACIÓN DEL ESPACIU AGRARIU EN MORCÍN

*Matilde Fernández Fernández*

La configuración del espaciu en **Morcín** entiéndese mirando'l conceyu de L'Aramo, nel oeste. Acolúmbrase un valle que va baxando n'altitú pero tamién en calidá de tarrén y en cantidá d'agua.

La cabecera L'Aramo, asitiada al norte, apanda a lo fondero nes abondoses parroquies de La Piñera y Peñerúes. La Foz, al sur, que vista perbaxo paez tar separtada por La Malena, y Argame, arrequexada al norte por La Pena Penanes, cayen dientro d'un mesmu valle zarráu polos picos que lu arrodién, al este. Nel valle central, el más grande y abiertu, los rabiones y viesques esfáñse en llombes y sucos qu'afuegen les vegues de los ríos que baxen camín d'*El Ríu Negru* (of. El Caudal) a lo fondero'l valle. Equí ábrese La Vega Argame, agora «entraera» del conceyu viniendo d'Uviéu. En medio de los montes d'esti valle, El Llenu Morcín cola ilesia de la parroquia cabezalera (San Esteban), llugar antañu de la xunta de conceyu, y debaxo, la capital, Castandiello, desasitiada acabante la guerra civil a Santolaya.

A media llomba, como semaes en cada canal, les caseríes unifamiliares, semeya de la hestoria económica d'Asturies: El Colléu, La Cruz, Pandoto, La Pruvía, El Viñés, El Bolao, El Collao, case-ríes d'asitiamientu no comunal onde s'amiesten casa y cuadra en medio pradería con mata al rodiu. De munches queden les muries, otres caltuviaéronse entrada la segunda metá del sieglu xx.

Per debaxo, los poblamientos grandes nel tarrén más ruino y, va pocu tiempu, col desendolque económicu, los nuevos asitiamientos en Les Vegues, La Roza, El Llerón y les colomines de Les Maces.

Morcín ye de tarrén calizo y plutónico, nuna estensión de 45 km<sup>2</sup> con munchos regueros y perimportantes fontes melecinales que nun foren mandaes pola mala comunicación del conceyu. Con tarrén abondoso n'Argame y La Retoría, arrodiaos de mates perzarras onde se cría *ganao* vacuno bono y bayuroso y onde se desanicieren les oveyes, burres y cabres. Esta ye la xeografía de Morcín qu'apurria Acisclo Muñiz nel 1935. Tenía entós 3.345 pobladores y taba a 9 km. d'Uviéu.

Mui averada a la realidá casi d'agora. Les comunicaciones yeren males cola capital, Uviéu, pero de siempres, la «saliera» del conceyu yera'l camín que de Mieres diba per La Foz, La Collá y Solamarena pelo fondero L'Aramo, a salir per camín de carru a Villanueva en Santu Adrianu y a Soto. Abarcaba asina conceyos de fonda rellación y llende de los matrimonios entráu'l sieglu xx. Esti camín tamién xustifica l'espoxigue de los pueblos no fondero L'Aramo y que Morcín caltuviere esa población toos estos años con Peñerúes como parroquia cabezalera, penriba la inmigración de La Foz.

Nomes de llugar como La Salguerosa, El Fresnial, L'Acebal, El Gamonal dan cuenta de la bayura xamascos qu'alvertía Madoz que tenía'l conceyu. Les mates zarraes, de castañares y fayes, como El Pinal, yá nun tán pero apaecen otres de fresnos y umeros nos praos abandonaos. De los abondosos árboles frutales que dieron nome a Figares, Ablaneo, la Figar, El Llenu Nisal o Los Peralinos, nun queda nin rastru.

#### LA CASERÍA, LA CASA SEÑORIAL, LA CASA

La casería ye un fexe de propiedaes que funcionen como caltenimientu de la familia. En dixebraes estensiones y calidaes, tie-

nen los mesmos elementos comunes: vivienda, cuadros, tierras, mata y praos que-y aseguraben la comida col ganáu y lo que diere la tierra.

### *La Casa Señorial*

45 km. de conceyu, munchu d'ello monte, nun había pa munchos señoríos. Tres cases señoriales, una partida agora en vivientes, una d'usu familiar y otra en manes municipales, repartíen les tres meyores *vegues* del conceyu. El Cotu Peñerúes, mientras nun foi mercáu polos vecinos nel sieglu pasáu, funcionó independiente del conceyu y asina figura nos censos de población y rexistros xudiciales. Los vecinos de les otres parroquies teníen el ganáu *en comuña* y *pagaben renta* polos praos y tierras. Na memoria los más vieyos el réxime en comuña yera seña de lo bonos que yeren los señores qu'aidaben al campesín que d'otra mente nun sedría pa facese con ganáu.

### *La Casería*

Nos poblamientos más bultables vense cases de casería, bien feches, con bones *puertes* y *ventanes de cantería*, *correor*, *cuadra*, *antoxana*, *parva*, *lliñiru* y *ciarru*; nel ciarru un árbol, casi siempre una figar, y el carru. Bien llendaes, zarraes con bonos muros de piedra, en delles ocasiones tamién teníen *horro* o *panera*. Lo que les xunía yera l'escasu númberu de fíos en tiempos de families numberoses o l'amestamientu de propiedaes de tíos solteros.

### *La Casa*

Les más, cases ruines a *rimaterreru* munches, con paredes de regodones na planta baxo y tabiques de *pandereta* (entabliellao de tarucos, barro y cascayos de rellenu) na planta cimera. Taben equi-

paes con *forna*, *correor* y *sala*. Lo normal ye topar grandes conxuntos d'edificaciones que paecen una unidá pero que tán repartíes ente cases y cuadros con munchos amos. La Casería, llugar de la parroquia de San Sebastián, con casa, horru y corrales, ye igualmente engañosa. Si foi antaño una casería, yá va años que los corrales son de munchos amos ensin rellación familiar nenguna.

La casa ye una pieza productiva en primer llugar. Tien corredor pa colgar el maíz, sala p'amontonalu y esfoyalu, cuadra pal ganáu, antoxana pa la lleña y los preseos y el llar de tierra pa tizar y calecer mayormente. Los *cuartos* pequeños namás pa dormir. Nun ta pensada como un espaciu pa vivilu porque se vive fuera lo más del tiempu. Na casa cómese y duérmese. Debaxo'l corredor, col tiempu, un *maeru* (pa sentase a dar la plepa nel branu al escurecer y pa costurar y texer les muyeres a lo cabero'l sieglu xx, y nes fachaes que llenden con camín, los finxos de piedra, que son «sentaeros». Ye más d'estimar que tenga *corrales*, *corraletos* o *tendeyones* onde posar una fesoría o les madreñes.

Cada xuba nos ingresos dexa una marca na arquitectura y nel paisax, xunció a un dexar enringleráu de los trabayos más duros. Asina, fanse cases en tierres, amiéstense dos o tres cases ruines pa facer una grande y el corral de vaques pasa a ser garax. Al empar, la casa orixinal pasa a ser trasteru. Muncha xente tien por eso una «casa vieya», «la otra casa», o «la cocina vieya» (el llar onde agora se cura'l samartín).

Nos años 60 apaecen les cases de tipu «dadu», con agua corriente y bañu. Nes cases vieyes zárrase un cachu corredor con un ventanu pa retrete. N'otres munches van zarrándose los corredores pa facer cuartos más grandes garrando sitiú del corredor y de la sala.

Nos años ochenta xurden los xalés, llantaos nes vegues, con escalera per fuera, terraza y teyaos verdes o negros pa marcar la diferencia. Vívese na planta riba, a un andar, como un pisu con toles comodidaes de la urbe. Amiéstase a lo cabero'l procesu'l llevar la

cocina, agora de gas, a la chabola o al sótanu. Caltiénense asina en munches cases dos maneres d'acocinar: la tradicional, más enrevesosa y trabayosa, na chabola, y la urbana, precocinada, na cocina nueva.

Nos ciarros, el *lliñiru* y el *picaeru* dexaron el sitiú a los tiestos; los muros de morriyos y les sebes de sanxuaninos son agora de formigón y fierro. Con ellos coló la figar cuando los figos pasaron de ser fruta a ser mundicia y namás valir pa dar mosques.

## L'HORRU

Parte perimportante de la casa ye'l quartu l'horru. Dividiós en cuatro cuartos, lo mesmo l'horru que la panera, tienen tres o cuatro *subieres* y tamién cuatro amos. Ye claro que yeren construcciones que namái se podíen entamar en comuña. Tamién el tarrén yera del común o dau por ún de los repartidores. Nesti casu, el propietariu perdía'l drechu a lo propio y el suelu pasaba a común. Per debaxo los horros pásase ensin pidir permisu y peles talameres andaben los rapacinos a carrenderes sin que naide-yos llamare l'atención.

Debaxo los horros víense los *carros* y *carreñes*, *araos* y *graes* de los propietarios de los cuartos; agora, el tractor y dalgún coche. Al nun ser propiedá individual, queda sometíu al drechu consuetudinario y a la conciencia de los repartidores, l'usu y, por ello tamién, l'abusu del suelu.

A naide se-y pasa pela cabeza agora guardar el samartín nel horru. Arrobaos dafechu, cuantayá que nun son sitiú seguru pa guardar coses de valir. El decretu llei de proteición de los horros de 1973 nun se notó nos horros de Morcín. La xente nun ta por meter perres no que yá nun-yos val pa nada, asina que de dellos queda'l sitiú y d'otros aguardar a qu'acaben de cayer, pa que dalgún lladín se quede col sitiú.

## LOS CORRALES

Amestaos a les cases, con planta pa les vaques y pagar con sue-lu de tablones de castañar o cebatu, tienen *bocarón* pa meter la yer-ba y *esmesaera* (buraca enriba'l *piselbe* pa cebar les vaques echando la yerba del pagar abaxo). Al pie'l corral, la parva cuchu, en sitiú a vegaes marcáu con un muru. Fechos de piedra, dixébreense en munches ocasiones de les cases pol bocarón, mucho más grande que les ventanes, y por nun tener corredor.

*La casería* tien que tener polo menos una cuadra y val tanto como una casa.

Nos praos de *merenga*, averaos al monte, vense les cuadros de piedra, con antoxana munches, semeyando una casa, y con *tende-yón de parrizu* tamién. Nos ventanos, *reposaeros* pa la xarra la lleche. Dempués de los años 60 apaecen los corrales de lladriyu, más a lo fondero y, va poco, los *cabanetos* de bloque pa les oveyes, bien cerca de los pueblos.

## LOS GÜERTOS

Son cachos de tarrén pequeños o medianos, bien zarraos y cerca los pueblos o ente les cases. Tópense güertos perpequeños dedicaos a berces o llechugues. Ye más importante la calidá de la tierra y la orientación que'l tamañu. Hailos *calientes*, más tempranos, que s'echen de patates en xineru; hailos *xelones* que se semen más tarde; *de tierra recio*, bono pa cebolles y *de tierra encenizao*, ruino, que quier más agua y nun da nada si vien la seca.

Nos güertos sémense estayes de patates y de fabes haciendo riegos a fesoria. Los arbeyos y los fréxoles échense nun riego averaos a les estayes de patates. Les berces, repollos y coliflores peles veres. En munchos, ruda pa tratar les vaques cuando «algüerten», abeyera p'aconceyar abeyes y apiu p'amatagar la fiebre.

## LA GÜERTA

Ye la pieza de tarrén nes *lloses*, más alloñada de los pueblos, nuna tanda tierra trabayao separtao en *pieces* por *finxos* o *muñones* (un morriyu llantáu nel suelu, con un sanxuán o un salgueru al pie). A lo fondero les güertes había cantidá de pescales qu'acabó con elles la térmica de Soto nos años 60. Y agora paez que vuelven aniciar.

## LA TIERRA

Mientras que güertos y güertes se caven a pala, la *tierra* ye un pedazu grande p'arar y acarretar col carru. Asitiaes nes vegues, no más bonancible'l tarrén, yeren pa semar en cantidá'l maíz, les fabes y les patates. Peles veres plantábense les ablanares.

## LA MATA

Heredada como cachu de tarrén de producción, taba dedicada a castañares, n'abertal; la divisoria ta cuntada por númberu d'árboles y les llendes van peles cárcaves nel tarrén y no llano per castañares marcaes coles iniciales del amu. Metanes los *castañeros* tópanse les *corres*, ciarros de piedra pa echar les castañes colos arizos, que se guarden pal avientu y son les más estimaes.

## LOS PRAOS

Lo más del tarrén en Morcín entovía ye prau. Dexaes pa prau les tierres en comuña, les *eríes*, *cortinales* y *morteres* dexaron dacuando'l nome pero lleven siglos de prau. Asina, El Pando, Los Cavaos,

La Roza, Rozaes, Cortiniella, sábese mui bien que fueren trabayaos pa tierra. Nun pasa lo mesmo con nomes más tapecíos como L'Aspra o El Pereu, que na documentación d'herencies del sieglu XIX consten como eríes y morteres con cargu de renta en copinos de pan.

Pa escontra'l monte, los praos son grandes, zarraos con muries na llende colo comunal, y bárganos y bones *portilleres*.

Nes antaño morteres, les pieces son pequeñes y tán zarraes de sebe d'espinaera, sanxuanos, salgueru y artos. Son los *campones*, qu'abulten nes parroquies más fondes y que-yos llamen *xarales* polo ruino nos díes de gües y lo escoso en yerba.

## EL COMÚN

Yeren comunes los caminos, que se *sestaferiaben*, empedrándolos y faciendo *regateres* y *sangraeres* pa los praos. Tamién yera del común l'agua de les fontes y regueros. Los vecinos, en sestaferia, llimpiaben de xemes en cuando fontes y fontanes y facien duernos y bebederos de piedra pal ganáu onde salía l'agua. Tamién iguaron *llavaeros* pa les muyeres nos fontanes, con bones *llavaeres* de llábanes pa resfregar los fatos. Los más nuevos con dos pozos, unu pa llavar y otru pa esclariar, que se respetaben dafechu.

En tou pueblu hai polo menos un *farfagón* (cárcaves argayaes por mor del agua). Aprovechábase pa tirar la mundicia. Antaño calderos rotos y potes afuracaes y como atayu de carrilones. Cola sociedá consumu foi medrando la mundicia y agora, rellenaos penriba, fueron faciéndose prestosos pa que los llinderos los amestaran a la finca y taponaren les salideres del agua que cuerre carretera abaxo.

Gracies al vezu vieyu de trabayar en sestaferia foi como llegó l'agua corriente y l'alcantarielláu a los pueblos del valle de Morcín nos años setenta del sieglu pasáu.



El Conceyu daba'l material y los paisanos trabayaben domingos y festivos pa facer la obra. D'ehí que que'l Conceyu n'años posteriores cobrarre pol serviciu de basura y alcantarielláu s'acoyere con daqué descontentu . Col agua del ríu y de munchos regueros funcionaben los molinos que dieron nome a llugares como El Molín de la Ponte o El Molín de Figares; otros de menos ruíu tienen el nome del *amo*. Unos d'usu familiar y otros como empresa, tuvieron vivos mientras duró'l maíz. Llantaos en propiedá privada, facien usu del agua comunal con preses que pasaben pel prau y volvien soltalo al ríu. Tamién les finques al pie'l ríu se *sangraben*. Sicasí esta actividá ta perllloñe de remocicar de magar el Conceyu d'Uviéu-yos mercó de por vida'l drechu al usu del agua.

D'importancia cimera pa la cría'l ganáu foron les *praeres* de los montes comunales, sobre manera L'Aramo. Al puertu echábense les vaques na primavera pa tener yerba que meter pel branu. Al rodiu d'esta actividá xurdieron les *cabanes*, de piedra y con *vellar* pa los xatos. Les cabanes yeren feches ente paisanos con llazos familiares y, por eso, non repartibles como heredá. Agora, desaniciáu'l drechu consuetudinariu, tán en manes del caberu veceru y tresformaes colos nuevos elementos de construcción, que se xustifiquen nuna manera vivir el monte agora más pa runfiar que pa trabayar, acordies cola modernidá.

Les fontes melecinales que taben mui lloñe de la capital pa ser mandaes como tal, nun lo tuvieron tanto cuando-yos fixo falta pa beber y asina colaron con tolos manantiales y secaron el ríu qu'agora mesmo ye regueru de mundicia.

Tamién yeren del común les mates de fayes, carbayos ya ablanos d'onde salía la *maera* pa xugos y pa tolos preseos de trabayu y de la casa. Pasao'l común al estáu en tiempos modernos, xurdieron los problemes llegalos pa cortar madera nestes mates y, desaniciaes dafechu, quedaron en monte peláu, con dalgún vieyu intentu de l'alministración de plantaes de pinos que xamuscaron.

## L'ENTAMU LA CASERÍA

Esti conxuntu propiedaes entamaba na herencia. Repartíase ente los fíos a partes iguales, midiendo tierres y praos en díes de gües, mates y árboles en número y, según los fíos, asina'l número de muñones en munches finques que paecen una.

Cuando se casaba un fíu, el padre dába-y animales si podía y los preseos de menester, que diben de fesories a maseres, macones, duernes, gadaña y fierros, pieces de *cerro*, camises, too nuevo o a medio gastar, y tasábalo en perres, a descontar de la partida de los bienes cuando morriere.

Nesti entamu tan escosu, nunca yera raro que viniere una vecina con una pita con pitinos pa regalar a los recién casaos pa que tuvieren un buen entamu. Esti principiu del regalu abarcaba a la lleche que se-y vendía al vecín cuando taba escosa la vaca. De vezu echar polo menos un quartu llitru de más de lo que te paga. Y yera normativo merca-y al vecín la carne de la vaca que se-y derribaba pa que la perda fore «más llevaera».

Lo normal ye facer *les partíes* cuando muerren los padres, y nun ye raro topar families que queden a mal por unu tener interés en quedase con una finca, nin que tampoco les cases queden ensin partir y acaben cayendo por nun s'averir ente los hermanos. Nun ye d'extrañar cuando se topen escritures nes que s'hereda la cuarta parte d'un nozal.

Si nun daba pa mantenelos a toos, menos pa entamar una casa, asina que la hestoria del *paisano* en Morcín ye la d'atropar propiedaes mercando praos o llevándolos en renta pa mantener el ganáu y seguir pasándolo apertao.

La renta de les tierres págase a vegaes en producción y lo de los praos en perres. La esceición son les finques nomaes «de La Madalena», na parroquia de San Esteban. Propiedá de La Malena (santa con capiya nel monte del so nome, que pertenez a esta parroquia), son finques que la ilesia pidía a los que pasaben a meyor vida

ensin herederos, y qu'al nun los cobrar la santa, quédase con ellos el *llevaor* ensin pagar al estáu tampoco.

Nos praos *llévase la yerba o la yerba y tapín*. Avísase pa dexalo cualquiera de les dos partes enantes de xineru. Si se gasta y ta cuchao del añu, el llevador tien drechu a la metá de *la coyía* del añu viniente.

Resulta chocante agora que dalgún vecín alloriare curiando de que los rapacinos-y robaren les cereces, el meyor divertimientu nel branu, o qu'un vieyu los escorriere por roba-y les cirueles o que s'escondiere nel corral pa pillalos a mazanes, pero dábase nos caberos años del sieglu XX, y yera tamién asuntu de reñes ente vecinos.

Nun yera tan raro viniendo d'unes dómines en que too yera poco p'atropar y tou espaciu y matu aprovecháu. Nun requexu d'un camín podíes topar un nozal que tenía amu, y na vera'l ríu, en tarrén comunal, hai castañares que son del que la plantó, con drechu a les castañes namái, non al suelu.

Les sebes divisories de finques son del que les plantó (si les punxo no d'él) o de los dos, pero los árboles de la sebe son de los dos porque comen de les dos finques.

## LOS CULTIVOS

Del *llinu* quedó'l topónimu La Llinariega na parroquia de San Sebastián. Paez ser que se semaba n'El Bolao en San Esteban, y entovía s'alcuerden de los filandones, que veníen los mozos y pagaben una perrina al ama'l llugar pal gastu'l candil.

La *escanda* foi pagu de renta y mui famoso lo de Penanes. En La Pena Penanes queden les muries na terraza de les tierres dedicaes a semar lo qu'en Morcín, con pesu, se noma *pan de sucu*. Del puxu'l cultivu queda dalgún molín de rabil debaxo los horros, yá desaparecíos los que taben al abellugu penones al pie'l ríu.

El *maíz* semábase nes vegues repartiendo estaya nes tierres coles patates y el *ballico*. Mui valoratible, aprovechábase'l granu pa comer, el *narvaso* pa les vaques, los *estaracos* pal fogar y pa facer *cucho*, la *fueya* pa los xergones y dempués pa *mullío*, cuando se camudó la fueya pola llana. Los tarucos valíen pa retacar tabiques y dempués pa tizar la cocina carbón.

Los nabos yeren parte perimportante de la dieta nel iviernu. Semaos en xunu postreru, yeren la base del pote entovía nel sieglu xx. Ye tala la so importancia que na parroquia de San Sebastián dan nome a la fiesta'l patrón. El venti xineru celébrase la fiesta los nabos, pote de nabos en toles cases de magar hai gochu pa con ellos.

## EL TRABAYU

Ye perclaro que con hacienda tan diversificada y tan ruina había que trabayar tol añu. Diben enreblagándose unes estayes a otres de tala mente que nun quedaba tiempu pa folgar.

Los cultivos fueron camudando col tiempu por razones económicas ayenes al campesín, que veníen de fuera, de los camudamientos nos intereses de los señoríos y col escayimientu de les tierres como valor de propiedá y poderíu.

La escanda dexó de semase porque yera mui trabajoso y perdiense munches coyíes nel mes de xunu por causa l'orbayu. El pan *acamazaba* y podrecía. Pero siempres quedó na memoria de la xente como daqué mui valoratible. Tanto, que nes puyes de los ramos llega a pagase mui bien pol *chuscu* en por sí.

Nes parroquies de San Sebastián y San Esteban entovía se caltíen el vezu dar «el pan de la Caridá». Esti pan que se repartía ente los probes supuestamente, foi nos años de la posguerra divisoria ente terratenientes que lo llevaben a la ilesia porque podíen semalo nes tierres, y los probes que nun teníen tierra pa semar. Anguaño camudó en cesta que rula de casa en casa cada selmana pa dalo

en perres al cura. El bollu de la madrina, que tamién yera d'escanda, pasó a ser *turtu d'ablana* y de confitería en tiempos más nuevos.

Na parroquia de San Sebastián les moces rameres (encargaes de llevar el ramu a la fiesta El Pilar) entovía facien por conseguir escanda pa los bollos nel sieglu xx.

Les tierras d'escanda quedaron pa prau y entamaron semar maíz. El maíz daba *torta*, *borona* y *farines*, pero nun acompañaba'l tiempu tampoco. Asina nos entamos del sieglu xx los vecinos dieron en facer novenes. Na parroquia de San Esteban arrecostinaben per un santu a Santolaya pa pidir sol pal pan en xunu y agua pal maíz n'agostu. Paez que nun dexaben de tener daqué culpa los santos, y sobre manera'l Cristu, que lu llantaben delante los maizales secos pa ver si nun-y daba vergüenza de cómo los tenía. Morcín dexó los maizales pa prau y pillólu la Guerra Civil en yerba. Foi tala la fame que volvieron a *rompese les tierras*. Si primero se semaba a *voleo* cola camisa fuera, llegaron a semar dos díes de gües con un copín granu a granu y la cesta tapada con un trapu pa que nun arranaren les vaques. Asina algamó gran puxu entraos los años 60 nes vegues y tierras. Una tierra y otra apegaes, de maíz, paecien una mata a los güeyos de los nenos que xugaben al escondelerite pente ellos, y debía selo pa los más mozos qu'enciscaben a les moces con dir al maizal.

Col tiempu, el maíz quedó pa los animales, camudó a *maizón* y a lo cabero pa prau. D'ehí qu'en Morcín *dexar pa prau* seya más abandonu d'actividá que yerba, y aplícase a tou tema que lleva nicios d'acabar en discutiniu.

Les ablanares trabayábense al rodiu les tierras y de los campos. Coyiense en setiembre y foron bona fonte d'ingresos mientras venien a compraes. Quedaron abandonaes, ensin cuchales cuando s'acabó la venta, mercábales *l'ablaniru Argame* pa tostaes pa les romeríes y acabaron siendo consumu de la casa namás.

Les pumaraes tuvieron *la mápula* nos años 60, que venía'l maza-neru a por elles a los pueblos. Los sacos apilábense ente les cases

y nos caminos y yera un ruíu como de romería al tiempu pesalos y cobrar.

La casería como centru producción fixo que fueren xurdiendo trabayos especializaos pa cada ocasión, que-yos apurríen los trebeyos que nun se facíen na casa. Asina, a lo llargo'l sieglu xx entovía había un *xuguiru* en La Boza, *goxiru*, *ferraor* pa ferrar les vaques, *molinera*, *ferreros* unos cuantos lleven el nomatu, y *canteros*. Cola venta les mates apaecieron los *maderistes* y los carreteros que sacaben la madera de les mates, y dempués acarretaben los vales de carbón. Tamién los había que sacaben carbón d'El Río Negru con chalupes pa ganar unes perres. Toos estos trabayos desapaecieron cola mecanización, pero munchos paisanos caltienen l'oficiu como apellú.

#### EL CICLU'L TRABAYU

L'actividá cimera del branu ye *andar a la yerba*, de xunu a setiembre. Al tiempu hai que facer *trabayos na tierra*, como sacar les cebolles enantes de que les pille l'agua d'agostu; acabante meter la yerba hai que *sacar les patates*; setiembre ye *pa esmesar les ablanes*, *sacar el miel de los caxellos* y *coyer les fabes*. Na seronda tóca-yos a *les mazanes*, dir a *la rebusca les castañes*, y *el samartín* al gochu.

Ye esti un calendariu mui apertáu, colos tiempos marcaos pol menguante de la lluna. Acabante coyer yá hai que ponese a preparar la tierra pa los ayos y pal pan. Hai que llimpiar los praos, regar y fradar les sebes. Ye l'avientu'l mes que dexa esconsonar a la xente del trabayu na tierra, pero nun los quita de facer otros llabores. Hai qu'esbillar les ablanes, enrestrar cebolles y maíz. Estos trabayos yá se fan dientro y les esfueyes yeren una bona disculpa pa pasalo bien, los grandes coles chancies, les mazanes asaes y la sidra duerneu, y los más pequeños pa brincar y rise manque nun acoyeren mui bien.

L'iviernu ye mui llargu y náguase pola Candelaria,

Si la Candelaria lloira, l'iviernu fuera.

Si la Candelaria se ri, l'iviernu ta por venir.

Pero'l prudente amiesta:

Si se ri como si lloira,

tarás a media ceba,

o apertarás la trebolguera.

El tiempu ye una de les grandes esmoliciones del campesín, siempres en referencia a los trabayos. Ye'l gran saludu y tema de conversación en cualquier xunta de vecinos, lo mesmo seya un entieru qu'un casoriu. Da la impresión de que nunca vien como tien que ser, cosa perdifícil onde s'amiesten intereses tan dixebraos. Si fai falta agua pa qu'echen los praos, podrecen les patates. Si dicen que cuando llueve a primeros d'agostu, llueven panoyes, les castañes, pola contra, quieren sol. «Agosto secu, morgaces y cestu».

L'añu entama iguando sebes y caminos y échase l'iviernu fuera llindiando vaques, fradando mazanales y *sallando'l* pan en marzu.

Nun ye namái'l tiempu'l que-y pon torgues al trabayu. L'ames-tamientu de drechos d'usu nes finques tamién ponía condiciones. El maíz tenía que tar semao primero del ocho de mayu que se *zarraben les carriles*, fixere sol o lloviere. Asina que se diz «en mayo, regando y semando». El que semaba na finca lo fondero de la carril, tenía además que sema-y la carril a los d'enriba. El que tenía una finca pa prau que regaba enriba d'una pa maíz tenía'l compromisu de facer la regatera per debaxo pa sacar l'agua sobrante. Estes condiciones asitiábense nos contratos de compraventa y yeren n'ocasiones causa de reñes y tamién de fesoriazos. Nun yera raro, tampoco, que los gochos qu'andaben al devalu, vinieren pa la corripa con un foceta-zu en llombu.

N'otres ocasiones ye la vixilancia de los vecinos lo que t'apura. Asina, el que nun tenía'l maíz sallao pa San Xuan teníaase por folganzán.

El cuándo y el cómo de les xeres tán marcaos por dichos. Asina cualquier cosa qu'entruques van dicítelo en refrán, quiciabes porque asina ye más fácil d'alcordase que pel calendariu.

Si quies inxertar árboles:

Pela Candelaria pera y piedra.

Pa cuando se salla'l maíz:

Sémame cuando quieras y sállame cuando me veas.

Y si quies saber cómo:

¿Panoyes tu o panoyo yo?  
Que panoye'l que mos semó.

Si lo que t'esmolez ye saber cuándo vas a coyer:

Castañares les de to güelu,  
mazanales los de to padre,  
ablanares les que tu plantes.

#### LA DIVISORIA'L TRABAYU

Xeres como segar la yerba, cargar el carru y amarrar, xoncer, fradar y enxertar árboles, albañilar y matar el gochu, siempre tuvieron en manes de los homes. Llavar, filar, texer y costurar, en manes de muyeres. Son les muyeres tamién les encargaes de cebar gochos



y pites, como un llabor más de la casa, y nun yera raro que tuvieren un truébanu o dos d'abeyes na talambra. Encargábense de sacar el miel que guardaben pa melecina. Tolos otros llabores fanlos lo mesmo homes que mueres. Qu'una muer «trabayu como cualquier paisano» ye pervalorabile, y al empar, qu'un home se defende na cocina si queda solteru o vilbu ye tamién de munchu méritu.

D'otra miente, el trabayu de les mueres na casería va a la escontra de los ingresos de la familia y lo mesmo pasa colos rapacinos. Los llabores repártense por edá y fuerza, nunca pola diferencia sexual.

Son llabores de nenos tolo que seya pañar: cascoxos pa les pites, ortigues y gamones pa los gochos, dir a la rebusca d'ablanes y a castañes pero tamién acarretar agua, lleña o cargues de yerba, segar ballicu col focete, amarrar los chorizos nel samartín y sobre manera, llindiar vaques. Llindiando vaques los guah.es entreteníense sacando grillos y xonciéndolos, ganando la «cebá» y xugando al cucurabucu. Los más amañosos facien carreñes de cebatu.

Tamién yeren los encargaos de dir cola vecera al monte mientres duraron les oveyes. En La Vara, averada a L'Aramo, caltúvose la vecera na posguerra, mientres nos otros llugares yá diben años que cada ún acordaba les d'él. Especialistes en correr tres les vaques peles caleyes cuando salíen tueyes yeren tamién los que les llevaben al güe. De Les Vallines y de La Figar espatuxaron bien de tiempu escontra la inseminación artificial.

Yá pelos años venti, los paisanos pagaben a un mayestru p'adeptar a los rapacinos a lleer y escribir y entamen a concasar día d'escuela con día de trabayu.

La suerte de cada casa mana nel número de fíos y que seyan homes o mueres. Nun ye casualidá que les tierres qu'*enmaruxaren* per San Xuan foren de solteres, y que los que quedaren cola casería namái, por bona que fora, morrieren aprobechayaos.

Esta casería, dafechamente escosa, obligó a la xente a catar trabayu fuera'l conceyu. Los homes colaben a trabayar a les mines d'Ar-

nao, o al conceyu d'Ayer y quedábense ellí díes ensin venir a casa. Les moces diben a vendese a Uviéu pa trabayar sallando peles case-ríes de La Manxoya, o trabayaben «na estayona», sallando maíz pa los terratenientes del conceyu; otres diben a curiar oveyes. Asina, la muyer que queda en casa tien que trabayar sola na tierra, o llin-diar vaques si nun tien nenos.

#### EL PAISAX AGRARIU

El paisax va camudando coles faltes económiques del campe-sín que trabaya la tierra y cría ganáu pa caltenese, pero allampia por un sueldu que-y tape los furacos. Cola revolución industrial les muyeres fueron amestándose al trabayu nes fábricas. Les moces de Morcín diben andando a la fábrica de La Manxoya, los homes pa la mina y Fábrica Mieres. La Fábrica Armes y les serreríes de Grau marcharon con tolos nozales del conceyu. Les mates de castañares foron cortándose y les tierres quedaron pa prau.

Camuda con estos cambios la comedera dafechu. L'aceite acaba coles farines pa cenar, y agora cénase patates tostaes o tortiella en toles cases. El gochu desanició un potax ruinaco de nabos, les fueyes de los nabos y arbeyos y caxines con mantega vaca o nates. Col refritu torrendos el pote ameyoró dafechamente.

Les actividaes comerciales del conceyu tuvieron puxu de sópi-tu y finaron d'esmenu ensin que'l campesín tuviere nada que ver. Por unes coses y por otres dexaron de valir les cádaes de les «érgu-mes» que se vendíen pa tizar n'Uviéu, la nieve los neveros pa esfrecer bebíes. Les ablanes, les mazanes y la lleche, que dexaron de venir a por ello, fueron dexándolo aminorgao pal gastu la casa y al empar dieron en vender lo sobrante nos mercaos, sobre manera en Mieres. Ye esti un mercáu ruin que viende lo qu'acarreta una muyer nuna güexa o nuna cesta (güevos, ablanes, berces y floritos), pa un veceru que caltién tastos de pueblu.

Apaeen al tiempu los chatarreros. Les cases van amañándose con calderos, palancanes, platos y vasos de La Industria. Los rapacinos mántense por axuntar fierros pa camudá-ylos al chatarreru por cacharros tan guapos de plásticu.

«Ladio l'hoxalateru» ye un personax cíclicu na vida los pueblos, qu'echa clavos nos furacos de les potes y fai xiblato d'hoxalata pa los nenos. Detrás vien el *chicharriru* colos deos blancos de la vinagre y detrás «la Pimianga» coles sardines nuna maniega y el «bonito». Dempués el «conomato» col xocolate y el café.

Les moces colaron más tarde a trabayar a los hospitales y fábricas de Mieres y munches families a estudiar los fíos a Uviéu o Xixón. Los que quedaron, dedicáronse a les vaques, llevando en renta los praos de los que colaren.

Col pozu na parroquia La Foz, El Llugar de Baxo algama de sópitu vezos urbanos, arrequexando la vida campesina. A la escontra, Argame nun amuesa enclín nengún por amestase al trabayu na mina. Casi ensin praos, queda amarrada a la vega, y tien qu'aguardar a que la Térmica Soto-yos ufierte emplegu. Ye asina que se diz «Argame, el pueblu la fame», pero tamién onde l'arquitectura popular se cultuvo con puxu, mesmamente nesti sieglu.

Anguaño, desaniciaes les vaques, muchos praos tán fechos monte y les tierres artadales. Los que quieren que-yos los atiendan tienen que paga-y al llevador o dá-ylo de baldre y el que tien un prau o dos por herencia nun viende pero atiéndelu tol añu ensin ganáu que-y lo paza o merca oveyes pa pacelo. Les oveyes son asina la ganadería del rexurdimientu, y los praos vuelven a partise en cachos; agora con allambreira y del mesmu amu.

La población activo ye dafechu urbano en vezos. Trabaya fuera'l conceyu y rula en coche tolos díes. Fai les compres nes grandes superficies y quita la llave la pesllera. Ye sobre manera residente de Morcín que patia poco los caminos.